

# Co statti cun il program turistic 2014–2021?

Damonda persunala da deputà Remo Cavegn (pcd, Razén)

■ (mc) Per pudair dar dumogn a las sfidas dal turissem grischun en l'avegnir ha la regenza grischuna lantschà l'onn 2013 il Program da cooperaziun dal Turissem grischun 2014–2021. En ina dumonda persunala sustegnida da 64 deputadas e deputads pretenda Remo Cavegn (pcd, Razén) scleriment davart intginas dumondas avertas. Per dar novs impuls al turissem grischun han chantun e confederaziun mess a disposiziun 2013 in credit da 21 milliuns che vegn surpiglià mingamai per la mesadad da chantun e confederaziun. Tranter ils criteris per pudair far adiever da quests daners da promoziun ha il chantun fixà tscherts criteris sco orientaziun al program turistic, plivalur evidenta, prontadad da cooperaziun cun auters acturs e relevanza territoriala en la regiun. Plinavant èn ins a la tschertga da novas ideas ed innovaziuns e capacitads persunalas e finanzialas. Per mesirar l'effienza dals projects inoltrads ston vegnir inditgads il retgav economisà, il dumber da pernottaziuns, la posiziun sin il martgà e la guida dal tema. In project duess sa distinguer cunzunt entras il ferm grad d'innovaziun tar il product, il process, la vendita u il servetsch. Apparentamain na duai il marketing dentant betg esser dign d'ina promoziun.



Deputà Remo Cavegn (pcd, Razén) s'infurmescha davart l'effect dal Program turistic 2014–2021.

FOTO O. ITEM

## Contribuziuns a 19 projects

Da la homepage [www.innovationgr.ch](http://www.innovationgr.ch) resorta ch'ins ha sustegnì fin qua 19 project cun contribuziuns finanzialas. I dat en egl che mo projects gronds èn vegnids sustegnids fin qua. Entant che las contribuziuns dadas concernan suletta-

main las regiuns Engiadina, Tavau e Lai, mancan projects d'autras regiuns (Val Renana, Surselva, Viamala etc.) totalmain.

## Dumondas concretas a la regenza

Da la regenza vul deputà *Remo Cavegn* intervegnir concretamain:

- Quants meds dal credit approvà da 21 milliuns èn gia vegnids concedids?
- Quants projects èn vegnids refusads?
- N'èn projects innovativs pli pitschens betg digns da vegnir sustegnids?
- Èn tut las dumondas da las regiuns Val Renana, Surselva e Viamala vegnidas refusadas u n'ha i dà naginas dumondas or da questas regiuns?
- Datti tar organisaziuns turisticas pitschnas ina mancanza da las resursas persunalas u/ni finanzialas necessarias per elavurar projects che pon vegnir approvads?
- Vegni insumma controllà schebain projects approvads èn insumma vegnids realisads e sch'els adempleschan ils criteris d'effect persistent, economisaziun da retgav, posiziun sin il martgà guidà, tematica en il senn d'ina controlla dal success u/e reporting.
- Quant autas èn las remuneraziuns annualas dal cussegl turistic (onuraris e spe-sas).